

2020-mut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Nunamullu Namminermut Naalakkersuisoq)

Saqqummiussissut

(Aningaasaqarnermut Nunamullu Namminermut Naalakkersuisoq)

Siullermeerinnineq

Matumuuna Naalakkersuisut sinnerlugit 2020-mut Nunatta Karsiata Naatsorsuutai saqqummiuppakka.

2020-mut naatsorsuutit Namminersorlutik Oqartussat kukkunersuiusuisa avataaneersunit nangaassuteqanngitsumik oqaaseqarfigineqarput. Ataatsimut isigalugu Namminersorlutik Oqartussat aningaasaqarnerat ajunngitsup tungaanut ingerlasoq kukkunersuiusup erseqqissaatigaa, tamannalu Naalakkersuisut nuannaarutigaa.

Ukioq 2020 arlalitsigut immikkuullarippoq. Ingammik coronap nunarsuaq tamakkerlugu tunillaassuunera pilersaaruterpassuit suliniuterpassuillu kinguartinngikkunigit taamaatippai. Tamanna soorunami Nunatta Karsiata Naatsorsuutaanut sunniivoq.

Nunatta Karsiata Naatsorsuutai 2020-mi ingerlatsinermi, sanaartornermi taarsigassarsinermilu; IST-mik taaneqartumik 168 mio. kr.-nik angusaqarfiupput, ilassutitullu aningaasaliissutit ilanngullugit 153 mio. kr.-nik amigartooruteqarnissaq missingersuutigineqarsimavoq. Tassa katillugit 321 mio. kr.-nik pitsanngoriaateqartoqarpoq.

Ingerlatsinermi sanaartornermilu angusat, IS-imik taaneqartumik, kisiisa naatsorsoraanni, naatsorsuutit 135 mio. kr.-nik amigartooruteqarfiupput, ilassutitullu aningasaliissutit ilanngullugit 455 mio. kr.-nik amigartooruteqarnissaq missingersuutigineqarsimalluni. Tassa katillugit 320 mio. kr.-nik pitsanngoriaateqartoqarpoq.

Nunatta Karsiata isertitaasa aningaasanut inatsimmi kingornalu ilassutit aningaasaliissutini tunngavigineqartunit 260 mio. kr.-nik pitsaanerunerat inernerup ersersippaa. Allanguut pingaarnertut nuna tamakkerlugu akileraarutip, nuna tamakkerlugu immikkut akileraarutip, ingerlatseqatigiiffiit akileraarutaata kiisalu toqqaannanngitsumik akileraarutit ilimagisamit qaffasinnerunerannik patsiseqarpoq.

Ingerlatsinermut aningaasartuutit nalinginnaasut aningaasaliissutinit 107 mio. kr.-nik imaluunniit 3,2 procentinik aningaasanut inatsimmut kingornalu ilassutit aningaasaliissutinit sanilliullugu qaffasinneruvoq. Ingerlatsinermi aningaasartuutini ataatsimut atuineruneg pingaarnertut covid-19 tunngavigalugu immikkut ittumik suliniutinik patsiseqarpoq.

Sanaartornermut aningaasaliissutini tamani katillugit 139 mio. kr.-nik aningaasaliissutinit annikinnermik atuisoqarpoq. Atuinikinnerunerit pingaarnertut Covid-19-ip sunniutaanik sakkukillisaassutinik sanaartornermik aningaasaliissutinik aningaasalersuinnermik patsiseqarpoq.

2020-mi Sanaartornermut Iluarsartuussisarnermullu Aningaasaateqarfimmi uninngasuutit 208 mio. kr.-nik appariarput. Tamanna sukumiinerusumik paasisaqarfigerusukkaanni immikkut sanaartornermik nassuiaat innersuussutigineqarpoq.

2020-mut Nunatta Karsiata Naatsorsuutaasa akuersissutigineqarnissaannut siunnersuutip Kukkunersuinnermut Ataatsimiititaliamut suliarineqartussanngorlugu innersuunneqarnissaa siunnersuutigineqarpoq. Naatsorsuutit siusinnerusuklut Ataatsimiititaliamut nassiunneqarput, taakkulu suliarfik ingerlallualereerpaat. Periarfissaq iluatsillugu Naalakkersuisut Ataatsimiititaliap siunnerfeqartumik suleqatigineranut qujassuteqarfigissavaa.

Naatsorsuutit saniatigut Kukkunersuinnermut Ataatsimiititaliap kukkunersuinnermut nalunaarusiaq, kukkunersuisut avataaneersut suliaat tiguaa. Naalakkersuisut ukiut siuliini periuusit assigalugit, ataatsimiititaliap nalunaarusiami kaammattuutit oqaaseqaatigineqartullu pillugit apeqqtigisinnaasai allakkatigut akissavaat, taamaalilluni taakku ataatsimiititaliap isumaliutissiissutissaanut ilanngunneqarsinnaaqullugit.

Naalakkersuisut 2020-mut Nunatta Karsiata Naatsorsuutai pillugit Kukkunersuinnermut Ataatsimiititaliamik oqaloqatigiilluarnerup nangingneqarnissaa qilanaaraat, ataatsimiititaliarlu sulilluarnissaa kissaallugu.

Taama oqaaseqarlunga Naalakkersuisut sinnerlugit 2020-mut Nunatta Karsiata Naatsorsuutai Inatsisartunut kajumittumik suliarineqartussanngortippakka.